



UPA2015/36-37
27. maj 2015
Aaja Chemnitz Larsen

Siunnersuuteqartuusutut piitsuussutsip killissaanik aalajangersaanissami ataatsimut inernilliisinnaasimanginnerput uggorivara, tassami siunnersuutini inuiaqatigiinni pitsuunerpaat ilinniagaqarsinnaaneri suliffeqarsinnaanerilu qulakkeerniarlutigit ataatsimut iliuuseqarnissaq siunertarineqarmat. Tassami piitsuussuseq nammineq iliuuseqarnikkut piitsuussutsimit aniguisinnaanginnertut nassuiarneqarpoq.

Piitsuussutsimit eqqorneqarnerpaasartut tassaapput meeqqat, inuiaqatigiinnilu tamani pitsuunerpaanut akuusartut tassaapput kisermaajullutik pilersuisuusut. Kisitsisit takutippaat aamma nunaqarfinni ilaqutariit piitsuussutsimit eqqorneqarnerpaanut akuusartut. Ilisimatusarnerit nutaajunerpaat takutippaat sivikitsukullammilluunniit piitsuussutsimik misigisaqaraanni tamanna meeqqanut kingusinnerusukkut sunniuteqarnerlussinnaasartoq. Meeqqat, ilaqutariit ataasiakkaallu kisimik piitsuussutsimit eqqorneqarneq ajorput, inuiaqatigiilli tamarmiullutik eqqorneqartarput. Meeqqat atuarneri piitsuussutsimit sunnerneqartarput – aamma piffissaq sivilunerusoq eqqarsaatigalugu – taamaalillutillu meeqqat inuunerminni periarfissamikku eqqorneqartarput.

Piitsuunermut killigititamik pisortatigut inissiigaluarutta naalakkersuinikkut akiuiniarnermi siunniussaqaarnissatsinnut periarfissarissaarnerussagaluarpugut.

Piitsuussutsip akiorneqarnissaani pinaveersimatitsisussamik piffissaq sivilunerusoq ataatsimoorussisumillu iliuuseqarnissatigut pilersaarusiorsinnaanerussagaluarpugut. Kinguaariinni atukkatigut kingornussisarnerit kipitinneqarnissaat anguniarneqarpoq, taamatullu meeqqat naligiinnerusunik periarfissaqarlutik inuunissaminnik toqqaasinnaanerat aqutissiuullutigu, soorlu FN-ip Meeqqanut Isumaqaatigiissutaanni taamatut allassimasoqartoq.

Tungavilersuut tassaavoq tamanna Naalakkersuisunit pingaarnertinneqanngitsoq, taamatullu Inatsisartuni pissaanerup pingasoqiusaaneranik paasinnissimanginneq naqissuserneqarpoq. Kim Kielsenip oqaatiginikuuaa Inatsisartut tassaasut Naalakkersuisut sulisitsisui, maannali allatorluinnaq takutitsisoqarpoq, Naalakkersuisullu oqaraangata unasutut oqaasii malinneqaannartalerput.

Nalunaarusiornissap kinguartinneqarneratigut, iliuusissiorinissamut taarsiullugu, angusassat annikissaqaat. Oqarusussinnaavugut pisaq illikaannarneqarsimasoq, tassami kinguartiinnarneqanngilaq, naalakkersuinikkulli aamma iliuuseqarnissap qanoq pingaaruteqartigininneranik oqariartuutiginnittoqarpoq.

2017-mi ukiakkut ataatsimiinnissamut nalunaarusiortoqarnissaa isumaqaannarpoq qinigaaffimmi matumani soriarsinnaanngitsugut. Meeqqat naligiinnerusumik atugaqartinnerisigut ilinniagaqarnissamut, suliffeqarnissamut imminnullu ilaqtanillu pilersuinissamut periarfissiisumik naalakkersuinikkut sapiissuseqannginneq iliuuseqarnissamut unitsitsisooqqippoq.